

---

Saksnr: 2020/72034-1  
Saksbehandlar: Lena Merete Søderholm

---

## Saksgang

Utval	Utv.saksnr.	Møtedato
Hovudutval for næring		15.10.2020

## Aqua-Nor 2021 - fellesstand

Forslag til vedtak

1. Vestland fylkeskommune vil delta med eigen fylkesstand under Aqua-Nor 2021.
2. Fylkesrådmannen får mynde til å arbeide vidare med prosjektet. Det vert etablert ei prosjektgruppe som planlegg og gjennomfører aktiviteten.

## Samandrag

Gjennom Vestlandsrådet har akvakulturnæringa på Vestlandet i ei årrekke vore godt synleggjort under Aqua Nor-messene gjennom ein fellesstand. I år legg dei to andre vestlandsfylka opp til eigen stand, og det det blir såleis nytt i 2021 med ein fylkesdekkande stand for akvakulturrelaterte verksemder og organisasjonar frå Vestland fylke. Ei prosjektgruppe med både interne og eksterne representantar vil syte for framdrift i prosjektet. Tiltaket er i tråd med føringar i Marin tiltaksplan (PS 22/2020) som vart godkjent av hovudutval for næring i møtet den 16. april i år.

Bård Sandal  
fylkesdirektør

Endre Høgalmen  
seksjonssjef naturressursar,  
landbruk og reiseliv

*Saksframlegget er godkjent elektronisk og har difor inga handskriven underskrift*

## Saksutgreiing

Bakgrunn for saka

Dei fire tidlegare (og noverande) fylkeskommunane på Vestlandet har gjennom ei rekke år lagt til rette for ein fellesstand på Aqua Nor for bedrifter og næringsliv knytt til akvakulturnæringa på Vestlandet. Aqua Nor vert arrangert i Trondheim i august anna kvart år, og er det største akvakulturmessa i verda. Den er i tillegg ein viktig fagleg møteplass og ei rekke ulike aktørar arrangerer foredrag, seminar, kåringer med meir.

Som eit stort oppdrettsfylke er det viktig for Vestland å synleggjere akvakulturretta næringsliv med komplette verdikjeder, FoU institusjonar, næringsorganisasjonar og klynger. For fylkeskommunen er det eit godt høve til å demonstrere fylkeskommunen sin aktivitet og ansvar innan vidaregåande opplæring, fagskular, akvakulturforvaltning, planlegging, forskingsfinansiering og tilretteleggingsprosjekt.

Neste messe vil vere i august 2021 og planlegging for gjennomføring må starte opp hausten 2020. Det er tinga areal i messehall D.

Vedtakskompetanse

Hovudutval for næring har vedtakskompetanse i denne saka.

Vurderingar og verknader

### *Stand for Vestland eller Vestlandet?*

På Aqua Nor 2019, valde Møre og Romsdal å ha eigen stand under messa, medan dei tre andre vestlandsfylka vidareførte samarbeidet og arrangerte ein fellesstand. Det er avklart at Møre og Romsdal også i 2021 stiller med eigen stand. Etter kontakt med administrasjonen i Rogaland fylkeskommune kjem det fram at om dei skal delta på Aqua Nor i 2021, vil også dei ha ein eigen stand for sitt fylke. Det vert difor klart at det på messa i 2021 vert ein fylkesdekkande stand for Vestland fylke vi arrangerer.

### *Planlegging, organisering og gjennomføring av fellesstanden*

Vestlandet sin fellesstand har tidlegare kjøpt inn tenester for å gjennomføre det ressurskrevjande arbeidet med planlegging av messestand, innsal av standplass til bedrifter og næringsliv, kontakt med underleverandørar og det praktiske arbeidet med design og bygging av stand. Dette er aktuelt også denne gongen, men vi vil også vurdere alternative løysingar saman med eventuelle samarbeidspartnarar i dette prosjektet.

I den innleiande fasa i planlegginga har fylkeskommunen sendt ein uforpliktande førespurnad til nokon av våre regionale samarbeidsaktørar og FoU-miljø om dei vil ha interesse av å vere medarrangør eller samarbeidspart på ein slik stand. Så langt fleire organisasjonar respondert positivt. Dette kan bli noko nytt og spennande for fellesstanden og vi vil følge opp desse og andre aktørar nærare med tanke på samarbeid i ein eller anna form.

Ansvar for planlegging og gjennomføring er lagt til INN - Naturressurs, landbruk og reiseliv. Det skal etablerast ei arbeidsgruppe med deltaking internt i fylkeskommunen og med aktuelle partnarar.

### *Fellesaktivitetar under messa*

Vi legg opp til å følge tradisjonen med å invitere representantar frå politisk og administrativt nivå til å vitje messa og fellesstanden. Vi lager då eit opplegg der desse får møte relevante bedrifter, FoU-institusjonar og aktørar frå fylket eller vestlandet for å bli kjend med det marine næringslivet i regionen.

### *Tidlegare erfaringar/evalueringar*

Etter kvar fellesstand på Aqua Nor-messene har det vore gjennomført evaluering av messa. Oftast vart denne gjort både av innleigd konsulent og frå arbeidsgruppa som var sett saman av ein marin medarbeidar frå kvart av dei fire fylkeskommunane på Vestlandet. Dette har gjeve oss greie og relevante innspel og vi har hausta mange nyttige erfaringar vi vil ta med oss inn i det vidare arbeidet. I tillegg har Sogn og Fjordane gjennom ei lang rekke år også arrangert ein fylkesstand for fiskerinæringa under Nor-Fishing (som vert arrangert dei åra det ikkje er akvakulturmessa). Slik

har vi også hausta erfaringar med fleire modellar for organisering og samarbeidsrelasjonar med næringslivet for gjennomføring av fellesstanden.

#### *Korona*

Grunna Corona-pandemien vart fiskerimessa Nor-Fishing 2020 avlyst. Det er sjølvstusagt usikkert om ei akvakulturmessa kan la seg gjennomføre, men på si heimeside stadfester Aqua Nor at dei planlegg gjennomføring av ei tradisjonell messe i 2021. I tilfelle avlysing som følge av pandemien, vil arealleiga bli tilbakebetalt til utstillarane.

**Økonomi:** I Marin tiltaksplan (PS 22/2020) som vart godkjent av hovudutval for næring i møtet den 16. april, er tiltaket skissert med ei kostnadsramme på kr. 600 000. Men tiltaket er ikkje finansiert pr no. Dette vert det arbeidt vidare med. Avhengig av kven som vert våre endelege samarbeidspartnarar vil vi vurdere ulike modellar for finansiering av fellesstanden under Aqua Nor 2021.

**Klima:** Ikkje relevant

**Folkehelse:** Ikkje relevant

**Regional planstrategi:** Marine næringar er av stor viktighet for Vestland og kystsamfunna våre. Styrking av verdikjeda knytt til akvakultur bygger opp under mål i regional planstrategi.

#### Konklusjon

Som eit stort oppdrettsfylke er det viktig å legge til rette for at den akvakulturretta verdikjeda i fylket får høve til å presentere seg på Aqua Nor i 2021. Vidare er det eit godt høve til at Vestland fylkeskommune får presentert sin aktivitet og sitt ansvar innan vidaregåande opplæring, fagskular, akvakulturforvaltning, planlegging, forskingsfinansiering og tilretteleggingsprosjekt på den viktigaste nasjonale og internasjonale møteplassen for akvakulturnæringa.

Sidan dei andre to fylkeskommunane på Vestlandet vel å stille meg eigen stand, vil dette også bli ein fylkesdekkande stand i 2021. Tiltaket er i tråd med føringar i Marin tiltaksplan (PS 22/2020) som vart godkjent av hovudutval for næring i møtet den 16. april i år. Det vert arbeidt vidare med finansieringsløysinga, men ein må ta ei avgjerd no om kor vidt vi tenkjer å vere med på denne messa.